



MENSAHE DI MINISTER PRESIDENT

MR. J.H.A. (HENNY) EMAN

BISPO DI ANA NOBO

Aruba, 31-12-1987.

Apreciable conciudadananonan,

Falta algun minuut pa nos sera un ana y yama bonbini na ana 1988.

Reflexionando ariba e ana cu a pasa nos por bisa cu nos pais Aruba tin su destino den su man atrobe. Aruba ta drenta su di 3 ana como pais ariba su mes cu frente na laira y cu un confianza grandi.

Apenas 2 ana pasa nos tabata mira con nos conciudadananonan tabata bandona nos suelo pasobra nos pais no tabata ofrece oportunidad mas.

Cu un stimacion profundo pa nos isla hunto cu nos pueblo nos a cuminsa bataya e situacion cu nos a encontra.

Awe, conciudadananonan, drentando 1988 nos por tin un curason tranquil pasobra nos esfuercionan no tabata en vano.

Conhuntamente nos ta poniendo nos pais ariba pia atrobe. Pa grandi y chikito oportunidad y speranza a worde crea atrobe.

Na 1987 Aruba por a cuminsa brinda trabao na su hendenan y den 1987 nos a alcanza di por duna nos generacion nobo e posibilidad pa prepara nan mes pa nos Aruba di mayan.

Nos programa di estudio pa Hubentud a pone cu nos ta yegando den apenas 2 ana casi 500 estudiante den exterior. Kizas awe nan ta leuw for di cas. Nos ta haya falta di nan pero nan ta futuro di Aruba.

Cu e base firme aki; cu e optimismo y confianza cu ta reina atrobe riba nos isla nos tin e conviccion cu 1988 lo bira un ana caminda nos mamanan y tatanan por bai ofrece un bida digno na nan famia atrobe. Mirando rond den mundo nos tin speranza tambe cu e ana cu ta bini por trece paz den mundo henter. Di serca nos ta sigui e desaroyonan den Centro America caminda Presidente Arias di Costa Rica a ofrece solucionnan cu lo por trece paz den e regio aki y pone un fin na e tristo mortonan di muchanan inocente.

E dos podernan di mundo, Estados Unidos y Rusia a yega na un acuerdo historico cu mester forma e base pa cuminsa elimina poco poco e menaza di un guerra nuclear.

Den nos region como pais Caribense nos a cuminsa saca man pa nos bisinanan.

Conferencianan conhunto ariba Turismo y Ensenanza a tuma lugar.

Nos encuentran cu Puerto Rico pa wak con conhuntamente nos por ofrece oportunidadnan nobo na nos pueblo-
nan ta e inicio di un cooperacion cu mester desaroya na 1988 y cuminsa produci resultado pa nos pueblonan. Mirando rond nos a mira tristeza serca nos bisina Haiti. Maske leuw geograficamente nos a comparti e temor di nos rumannan eynan y como un bloke nos a sali pa mira kiko nos, con chikito cu e ta, nos por ofrece pa drecha bida di otronan ariba nos mundo. Conciudadananan, nos ta un pueblo cu semper a convivi cu otronan y pesey na momento cu nos worde yama pa ofrece un man nos t'ey pasobra hunto nos ta forma e humanidad mundial. Esaki ta locual ta haci nos isla chikito un pais grandi.

Ta nos hendenan a pone cu durante 1987 Aruba tabata centro di atencion den diferente direccion.

Nos a worde escohi pa eventonan internacional. Orguyosamente nos a presenta Aruba ariba plataformanan internacional como pais nobo cu ta trahando duro pa un bida digno pa su comunidad.

1988 ta un ana hopi prometedor.

Pero lo tin momentonan dificil tambe. Y pesey mi kier haci un yamada nacional pa nos sigui conhuntamente ariba e rumbo cu nos a inicia pa asina nos garantiza un berdadero prosperidad pa tur nos hendenan. Mayan nos ta drecha e di 3 ana como un pais ariba nos mes. Mescos cu mi a haci bispo di nos Status Aparte, awe atrobe mi kier ripiti un invitacion na tur organisacion politico pa corda cu nos Constitucion

no ta haci nos oponentenan, sino e defensor di e balornan di nos pais.

Aruba ta di nos tur y nos tur mester bringa p'e y no laga nos pasionnan politico haci dano na e baranca aki cu nos tur ta stima.

Semper nos lo mester corda cu ningun generacion por scohe e tempo of circunstancia den cual e ta nace, pero si e por, cu conviccion y boluntad, cambia e circunstancia aki den un circunstancia cu ta brinda trabao y oportunidad.

Laga nos continua e tradicion di nos pueblo cu a trece claridad caminda tabatin sombranan, cu a trece cuminda caminda tabatin hamber y caminda tabatin tristeza a trece alegria.

Conciudadanonan, mi deseonan pa un Bon Ana y cu Dios bendiciona nos hogarnan y duna nos un ana cu prosperidad y felicidad.

Bon Ana.